

mexe, una nave raguxea venuta de Pulgia da Brindezi in zorni 11, per la qual se intexe la lacrimabel et angustioxa adversità seguita in Bressa, che più oltra zerecha a zìò non volgio estendermi per non renovar nè acresser a me nè ad altri mazor cruzio nè cordoglio de quel che se patisse et sente; ma solo voltandomi con el cor al zielo suplico el Potente sopra li potenti se degni con la clemente sua misericordia liberar la patria et povera Italia da persecuzion.

248* El franzexe ambassador montò al Cajero et li è stato più onorato de quel fu de qui, et molto par sia stato azetto et grato al signor Soldam; et per quel era con fondamento intexo, par abi concluxo che avendo el gran maestro de Rodi afidato per suo lettere de non molestar l'armada del dito signor Soldam nè suo subditi, et questo par fusse scritto quando Tangavardi turziman fu imbassador a Rodi per recuperar Magrabiey, che stante tal letere se debi mandar una nave del consolo de' cattelani a Rodi et far salvoconduto vengi ambassador del dito Gran Maestro per deluzidar tal cossa; et che se lui non vorà condesender et restituir quel de ditta armada in eser si trova con li prexoni et del resto prender asesto, che lui imbasador per nome del suo re de Franza li promete sarà retenute tutte le intrade che al suo regno hanno la Religion, et per quelle, stante le sopraditte letere, sarà sora de ditta armada satisfatto. Et con questo apontamento è stà deliberà tutte le nazioni forestiere che al Cajero erano retenute, et de qui ne sono già venute grande parte, e per comandamento del Soldam è stà desbolà suo' magazini con libertà che posino vender et comprar. Et quel suo consolo par siano retornà in più favor et grazia de quel era prima; el qual *in secretis* solo longamente è stato a parlamento con el dito signor Soldam et dixeno poi a cavallo, et che se ne va per el Caiaro dove a lui par et piaze. El suo imbasador hanno tolto lizenzia de andar in Jerusalem per fin che li verà risposta; et poi retornato sarà nel Cajero, se dize el dito signor Soldam aver deliberà et promesoli de mandar con lui uno suo onorato imbasador in Franza, con aver dito che l'amizizia et benivolenzia de' signori et prinzipi si conferma con imbasadori e non con letere.

El clarissimo orator nostro de qui è stato molti zorni, perchè se dizeva che 'l Soldam presto dovea de qui vegnir, et anche per esser stato fora de la terra questo armirajo contra arabi ch'è nel paexe, danizando era sublevati, et intexe la venuta del dito Soldam non dover esser *pro nunc*. Et ritornato el

dito armiralgio ne la tera, a dì 28 del passato, el prefato clarissimo orator se messe a camino per Roseto et el Cajero, che Idio Omnipotente se degni donarli presta et bona expedition. Se zudicha fin questo zorno el debi esser zonto al Cajero; nostri de li lo aspettavano come nel limbo fu da' santi padri aspetato lo advenimento del nostro mixericordioso Salvator, el qual suplico et prego se degni dissolver ogni avinculo et liberar tuti nostri da ogni parte con prosperità et paze de la patria.

In Alexandria, a dì 9 mazo 1512; scripta per

MARCANTONIO MORA.

Exemplum.

249

Sequitur letere di Alexandria de dì 9 mazo 1512, drizate a sier Donado Marzelo, ricevute a dì 20 luio.

Come el judicha a dì 6 dil corente il magnifico orator nostro sarà zonto al Caiaro, dove è stà preparà per suo alozamento una beletissima caxa ne la qual soleva stanziar la rezina soldanessa vechia, pocho luntana dal castello, per el che vien pronostichà, et *maxime* da questo armirajo, esser bonissimo segno; che a Dio piazza ne abi a sequir mior effeto con bon asetamento et liberazion de' nostri, azò con paze et prosperità se possi far qualche bene, chè ormai ne saria hora. A dì 22 dil pasato de questo porto feze vella et partenza nave 8 et galioni 3 a la latina, in tutto vele 11 del signor Soldan per Constantinopoli, et trase da sporte 160 piper et altre specie per valuta de ducati 30 milia, con ordine de ritornar cargo de legnami et coriedi per bisogni de l'armada de India, la quale, mi par, sarà molto longa.

Exemplum.

250

1512 a' 16 april. In Alessandria zonzesemo a dì 17, poi nanti zorno se tirasemo con le galie soto al Farion, et a una hora di zorno el vice consulo, che era missier Alvise Mora, con li altri mercadanti si veneno con un palaschermo fatto de un gripo fornito de pani d'oro, veludi cremesini, scarlati, et altre barche et nave fornide a foza di palaschermi, et la magnificentia di missier montò in gripo con alcuni de nui vestito con la veste dogal di restagno d'oro fodrà di armelini, con tutta la compagnia parte vestita de seda, parte de scarlato et